

Fasnacht 2002



Cross – Swiss – Fresch Air

Eb A, B oder C es bruucht kai Wett
am Schluss isch immer alles Z
Z fir Ziri die Stadt vo Wält
wo me ummeschiebt unser aller Gäld
A wie Ad Astra und d Alpar vo Bärn
B wie Balair sin die alte Stärn
wo liichte am Himmel vo dr Schwyz
und fliege mit em Schwyzer Grizz
Bider, Mittelholzer, Koepkte und Schaer
und dr Basler Ehinger mit Gäld, au är
sind Pionier vo de erschte Stunde
und bringe d Flieger uff iiri Runde
1931 duet me aber d Swissair grinde
und d Pionier mien alli gli verschwinde
d Zircher dränge sich jetzt fire
und zwingen s Fluggschäft vor iiri Diire
alles mues ewägg wo si kennt hindere
und dr Yyfluss wurdi mindere
Siggs speeter die ney Balair oder d CTA
alles mien si sofort unter Kontrolle ha
s wird ybernoo und liquidiert
aagäblig will das alles nit rentiert
dr Filz vo Ziri isch entstande
und alles beherrscht jetzt die Bande
d Konjungtuur duet au stimme
d Gwinn dien hechtschi Spitze erklimme
scho gli duet me sich yebe
wie me sich gegesyttig ka s Gäld zueschiebe
und me kimmeret sich nim um d Sach
wägge däm Gältsäage wird me schwach
merggt nit as s Schiff us em Rueder lauft
will me alli maroodi Firme zämmekauff
lost das Schiffli aifach singge
und klopft denne no schnäll d Fingge
eb Honegger, Mühlemann oder au d Spörri
e kaine vo däm Filz findet – das stööri
«dr Bund und alli Andere selle jetze wytter mache»
mir hän jo s Gäld uf dr Sytte und kenne lache...
e Taasggfoors duet me sofort grinde
wo s Schlimmschte sott verhindere
sofort stoot dr Zircher Filz widder an dr Spitze
as Sii au widder an dr Sunne sitze
Das isch denn wichtig – und öbb
s goot schliessig um dr Zircher Höbb
me diskutiert und duet sich zämme yyberleege
wie me die Näggschte denn ka leege.
Sogar dr Bundesroot merggt das nit
und macht bi dämm Theater mit.
Gälder us de Stytre ziet me aane
as me dr näggschi Coup ka plaane...
Halt, syt zwanzig Joor isch doch do Aine
vo Basel – numme e Pilot e Glaine
mit ere Idee und wo d Crossair het grindet
Erfolg het und immer Märggtlugge findet
mit emene Team wo duet zämme stoo
wenns emoll schlächt duet go
das nutze mir jetzt nadiirlich uss
aber achtig die kemme do jo druss
derfe aber unsri Kreise jo nit steere
und sich uf kai Fall weere
wägge däm mues dr Sutter verschwinde
die ney Gsellschaft dien mer ooni Moritz grinde
mit em Gäld vo alle Schwyzer uf unsere Bangge
und de Stytre vom Birger zwingen mer en in d Schrangge
fir d'GV schiggt me e willige Ma wo luegt
as alles lauft non em Wille vom Guet
so kunnts au uuse und alli Aktionär uff iirem Platz
mien sich unterwärfe em Wille vom Paradeplatz
und aimool me wird uns demonstriert
wer do in dr Schwyz regiert.
Dr Glai und s Volgg wird nur aanezooge
wenns sich fir s Kapitaal duet loone
Sunscht lost me si sich sälber yberloo
und kurzerhand entloo.
Nur no s Kapital und s Gäld
bestimmt no unsri Wält.
Oo, Helvetia, was draisch du fir e Grizz
mit dinere liebe, scheene Schwyz...

.....
D Ladaärne-Uusstellig isch vom Mändig znacht, em
18. Hoornig, bis am Mittwuch demorge, em 20.
Hoornig, fir alli Bsuecher gratis offe uff em
Minschterblatz.